



POLASÁI MAIDIR LE HÚSÁID FÓN PHÓCA & GLÉASANNA LEICTREONACHA PEARSANTA

RÉAMHRÁ

Dréachtaíodh an polasaí seo ar bhonn chomhoibríoch agus scaipeadh é i measc phobal na scoile.

RÉASÚNAÍOCHT

Tá fón póca ag cuid mhór daltaí scoile anois, fiú amháin in earnáil na bunscoile. Cruthaíonn an leas a bhaintear as fón póca agus gléasanna leictreonacha pearsanta roinnt deacrachtaí ó thaobh cur isteach agus tarraingt aird i dtimpeallacht na scoile. Is féidir leas a bhaint astu chun deacrachtaí smachta a chruthú agus mar bhealach chun bulaíocht a dhéanamh ar dhaoine eile. Is féidir leis an inniúlacht atá ag gléasanna chun grianghraf a ghlacadh, físeán nó píosa fuaime a thairfead, nó a sheoladh, cur le deacrachtaí ó thaobh Caomhnú Páistí agus ó thaobh Cosaint Sonraí de. D'fhéadfaí an leas a bhaineann foireann na scoile agus cuairteoirí as an teicneolaíocht seo, dlíthe um Chosaint Shonraí a shárú.

NASC LE hÉITEAS NA SCOILE

Bíonn Gaelscoil Bhun Cranncha ag cur timpeallacht páiste-lárnach chun cinn, timpeallacht ina bhfuil na páistí sábháilte. Freastlaítear ar riachtanais na bpáistí, an méid is gur féidir, agus cothaítear meas i gcultúr a chuireann an-luach ar éagsúlachtaí agus ar dhifriochtaí. D'fhéadfadh úsáid fón póca agus gléasanna leictreonach pearsanta teacht salach ar an timpeallacht slán sábháilte scoile, agus níl siad fabhrach don fhoghlaim.

AIDHMEANNA & CUSPÓIRÍ

- Cosc a chur ar úsáid fón póca agus gléasanna leictreonach pearsanta (mar shampla uaireadóirí cliste nó taibleid) i measc daltaí, ar suíomh na scoile nó nuair atá siad ag glacadh páirte in imeachtaí scoile ar nós turais, nó imeachtaí seach-churaclaim. Déantar é seo chun timpeallacht slán a chruthú, agus chun laghdú a dhéanamh ar chur isteach ar fhoghlaim na bpáistí
- Chun timpeallacht slán, sábháilte, páiste-lárnach a dheimhniú, atá ar fáil do na páistí ar fad
- Chun cloígh le Reachtaíocht um Chosaint Sonraí (GDPR)

NÓS IMEACHTAÍ SCOILE

- Ní cheadaítear úsáid fón póca nó gléas pearsanta eile i measc páistí a fhreastalaíonn ar an scoil, nuair atá siad faoi chúram fhoireann na scoile, ar scoil, ar thurais scoile, nó nuair a bhíonn siad páirteach in imeachtaí seach-churaclaim. Níor chóir do na páistí, mar sin, fón póca nó gléas pearsanta eile a thabhairt leo ar scoil, nó nuair atá siad ag glacadh páirte in aon imeachtaí scoile
- Ba chóir aon fhón póca a fhaightear a thabhairt go dtí oifig na scoile
- Is féidir le haon pháiste gur gá dóibh dul i dteagmháil le baile i rith am scoile, é sin a dhéanamh trí rúnaí na scoile, ag úsáid guthán na scoile

- Cuirtear i gcuimhne do thuismitheoirí/chaomhnóirí i gcásanna éigeandála, go bhfanann oifig na scoile i gcónaí mar an chéad phointe teagmhála. Cinntíonn sé seo, go dtagtar ar an bpáiste go tapaídh chun teachtaireacht a chur chucu
- Sa chás go mbraitheann tuismitheoir go bhfuil sé **riachtanach** go mbeadh fón póca/gléas leictreonach pearsanta ag páiste ar scoil, cuirfear na nithe seo leanas i bhfeidhm:
 - Is gá go mbeadh an fón/gléas pearsanta múchta agus tugtha don mhúinteoir ranga ag tús an lae scoile. Coinneoidh an múinteoir ranga gach fón agus gléas ina t(h)airreacán go dtí deireadh an lae scoile. Tabhair do d'aird nach bhfuil tarraiceán ag gach múinteoir gur féidir a chur faoi ghlas.
 - Tabharfaidh an múinteoir ranga an fón/gléas pearsanta ar ais don pháiste, ag deireadh an lae scoile, nuair a shroicheann an páiste barr an líne, mar chuid den nós imeachta dul abhaile
 - Ní cheadaítear don pháiste an guthán a chur ar siúl go dtí go bhfágann sé/sí suíomh na scoile. Dá ndéanfadh páiste seo, bheadh sé/sí ag teacht salach ar an bpolasaí seo agus leanfadh an múinteoir na smachtbhannaí mar a leagtar amach thíos
 - Ní ghlacann Gaelscoil Bhun Cranncha aon fhreagracht as cailliúint/damáiste d'fhón póca nó do ghléasanna leictreonacha, má thógann páistí ar scoil iad

SMACHTBHANNAÍ

- Más rud é go dtagtar ar pháiste le fón póca nó gléas leictreonach eile ar scoil nár tugadh don mhúinteoir ranga ar maidin, d'aon ghnó, tógfar an fón uathu. Ní thabharfar an fón ar ais go dtí go mbailíonn tuismitheoir/caomhnóir/cúramóir é
- Níl an scoil faoi dhliteanas as athsholáthair aon fhón póca nó gléasanna eile a chailltear, a ghoidtear, nó a dhéantar damáiste dóibh
- Corpraíonn an scoil an polasaí seo isteach san gCód Smachta agus an Polasaí Úsáid Inghlactha, agus déanfar deileáil le haon sárú sa chaoi chéanna is a ndéantar deileáil le sárú sna polasaithe eile sin
- Más rud é go n-úsáideann páiste a f(h)ón póca nó gléas pearsanta chun grianghraf nó físeán a ghlacadh de dhalta eile nó baill foirne, nó a roinneann teachtaireachtaí nach bhfuil oiriúnach, aithneofar é mar dhrochiompar tromchúiseach nó mar dhrochiompar tútach, agus gearrfar smachtbhanna a ritheann le Cód Smachta na scoile air/uirthi

TURAS SCOILE

Níl cead ag na páistí fón póca nó gléas leictreonach eile a thabhairt leo ar thuras scoile (nó aon sórt turas taobh amuigh den scoil). Beidh uimhreacha teagmhála ag an múinteoir más rud é go bhfuil sé de dhíth dul i dteagmháil le thuismitheoir/caomhnóir. Baileofar fón póca/gléas pearsanta leictreonach sa chaoi céanna is a ndéantar gach lá, agus tabharfar ar ais iad ag deireadh an lae scoile.

Tá proiséal difriúil i gceist do pháistí Rang 6 a théann chun na Gaeltachta ar feadh seachtaine agus míneofar na rialacha maidir leis seo do na páistí agus do thuismitheoirí/chaomhnóirí sula n-imíonn siad.

POLASAÍ FÓIN I LEITH FHOIREANN NA SCOILE

Ag tabhairt san áireamh na dualgais agus na cúraimí a leagtar ar fhoireann na scoile agus iad i mbun oibre le páistí, tá sé rí-thábhachtach go mbeadh baill foirne gafa go hiomlán leis an teagasc

amháin i rith uaireanta oibre. Sa chomhthéacs seo, is gá go mbeadh rochtain ar fhón i gcásanna práinneacha amháin.

Glaonna Oibre

- Moltar glaonna/comhrá ar líne chuig tuistí/caomhnóirí a choinneáil chomh gearr is gur féidir. Nuair is gá comhrá níos faide le tuistitheoir/caomhnóir, ba chóir coinne a shocrú chun bualadh leo. Ba chóir leas a bhaint as fón na scoile le haghaidh gach glaoch a chuirtear ar thuismitheoirí
- Ba chóir glaonna ar dhaoine proifisiúnta agus eagraíochtaí a dhéanamh i gcomhar leis an bPríomhoide, agus eagrófar feitheoireacht ranga nuair is gá

Glaonna Pearsanta

- Go ginearálta, ba chóir glaonna pearsanta a dhéanamh i rith amanna lóin
- I gcásanna práinneacha, ba chóir do bhaill foirne discréd a léiriú nuair atá siad ag cur glaoch
- Is gá glaonna pearsanta isteach a choinneáil do chúrsaí práinneacha amháin

Fón Póca

- I rith am teagaisc, ar dhualgais sa chlós agus i rith cruinnithe, ba chóir fón póca a bheith múchta, nó curtha ar an mód ‘tostach’ nó ‘discréideach’
- I gcásanna práinne, ba chóir do bhaill foirne discréd a úsáid nuair atá siad ag cur glaoch. Níor chóir fón a úsáid i radharc na bpáistí, ach amháin i gcásanna éigeandála
- Leanann seoladh teachtaireachtaí/leas eile a bhaintear as fón na rialacha céanna is ag cur glaoch

RIALÚCHÁN COSAINT SONRAÍ PEARSANTA (GDPR)

Cuirtear i gcuimhne do bhaill foirne, do thuismitheoirí agus do chuirteoirí chun na scoile gur sárú ar Rialúchán Cosaint Sonraí Pearsanta is iad ag glacadh íomhánna/físeáin de na páistí ar áitreabh na scoile nó/agus iad ag glacadh páirte in imeachtaí/taispeántais scoile. Tá cosc ar sheoladh íomhánna/taifead ar na meáin shóisialta chomh maith.

CUR I bhFEIDHM & ATHBHREITHNIÚ

Tá foireann na scoile ar fad páirteach i gcur i bhfeidhm agus i gcomheagar an pholasáí seo, agus déanfar athbhreithniú air go leanúnach, de réir mar a thagann teicneolaíocht nua chun cinn.

FAOMHADH & CUMARSÁID

Cuireadh an polasaí faoi bhráid Bord Bainistíochta na scoile ar **25/02/26** agus faomhaíodh é. Cuireadh ar fáil do phobal na scoile ar shuíomh gréasáin na scoile é.

Síniú:

Colm Ó Tuathaláin

Cathaoirleach

Pól Mac Daibhéid

Príomhoide

